

**2022-imi akileraarutitigut ilanngaattissat il.il. imatut angissusilerneqarnissaannik  
Inatsisartut aalajangiiffigisassaattut siunnersuut:**

- 1. Inummut ilanngaat.....kr. 48.000 (ukiumut)**
- 2. Ilangaat aalajangersimasoq.....kr. 10.000 (ukiumut)**
- 3. Aningaasarsiat B-t akileraaruteqaataasussaannngitsut kr. 5.000 (ukiumut)**
- 4. Killilimmik akileraartussaataasut ilanngaataat.....kr. 1.000 (ukiumut)**
- 5. Kommunitut ataatsimut akileraarut.....6%**

*Aningaasaqarnermut Nunamullu Namminermut Naalakkersuisumit saqqummiunneqartoq*

### **pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerneqarneranut**

### **ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Paneeraq Olsen, Naleraq, siulittaasoq  
Inatsisartunut ilaasortaq Erik Jensen, Siumut, siulittaasup tullia  
Inatsisartunut ilaasortaq Knud Mathiasen (sinniisoq), Inuit Ataqatigiit  
Inatsisartunut ilaasortaq Agathe Fontain, Inuit Ataqatigiit  
Inatsisartunut ilaasortaq Aqqalu Jerimiassen, Atassut  
Inatsisartunut ilaasortaq Vivian Motzfeldt, Siumut  
Inatsisartunut ilaasortaq Jens Frederik Nielsen, Demokraatit

IIA2021-mi ulloq 3. maj 2021-mi siullermeerinninnerup kingorna ataatsimiititaliap misissorpaa.

### **Siunnersuutip imarisaa siunertaalu**

Naalakkersuisut siunnersuutigaat 2022-mut akileraarutitigut ilanngaattissat il.il. 2021-imut sannilliullugit allannguuteqassanngitsut. Tamatuma peqatigisaanik kommunitut ataatsimut akileraarut allanngortinneqassanngitsoq siunnersuutigineqarpoq. Ilangaatit il.il. ataasiakkaat erseqqinnerusumik eqqartorneqarnerat, atuuffii kiisalu ukiuni siusinnerusuni angissusilerneqarsimaneri eqqarsaatigalugit ilanngussaq 1 innersuussutigineqarpoq, soorluttaaq 2022-mi aningaasarsiat tunngavissaattut naatsorsuutigisat ilanngussaq 2-mi nassuiaatigineqartut. Akileraarutitigut ilanngaattissat kommunitullu ataatsimut akileraarutit allanngortinneqannginnerat akileraartarnikkut iluarsaaqqinnissamik Naalakkersuisut

siunnersuutigisassaannut attuumassuteqartoq Naalakkersuisut saqqummiussisummini innersuussutigaat.

### **Siunnersuutip Inatsisartunit siullermeerneqarnera**

Siunnersuut aappassaaneernejarnissani sioqqullugu Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq. Akileraartarnikkut iluarsaaqqinnissamik oqariartuuteqarneq oqallinnermi qitiutillugu sammineqarpoq, tamatumani akileraartarnikkut iluarsaaqqinnissamut kissaatiminnik partiit saqqummiussillutik. tamatuma saniatigut inummut ilanngaat aamma oqaluuserineqarpoq, tamatumanilu oqaatigineqarluni inummut ilanngaat 2005-imili akinut akissarsianullu iluarsineqarsimangitsoq.

### **Tusarniaanermi akissutit**

Naalakkersuisut ima paasissutissiipput:

*”Inatsisartut aalajangiiffigisassaattut siunnersuutaat kommuninut tusarniutigineqarami, tusarniaanermut piffissaliunneqartup iluani akissutinik tigusaqartoqarsimangilaq. Taamaattorli tusarniaanermi piffissarititaasup kingorna Kommuneqarfik Sermersuup nalunaarutigivaa kommunit tungaannit allanngortitsinissaq kissaatigineqanngitsoq.”*

### **Ataatsimiititaliap siunnersuummik suliarinninnera**

Siunnersuut matumani pineqartoq Aningaasaqarnermut Akileraartarnermullu Ataatsimiititaliap ulloq 4. maj 2021-mi ataatsimiinnermini suliaraa. Akileraartarnikkut iluarsaaqqinnissaq siunnersuummik siullermeerinnilluni oqallinnermi assut sammineqartoq ataatsimiititaliamit oqaatigineqassaaq. Akileraartarnikkut iluarsaaqqinnissamik ingerlatsinermi akuutinneqarnissani ataatsimiititaliap qilanaaraa, taamaattumillu Aningaasaqarnermut Nunamullu Namminermut Naalakkersuisumik ataatsimeeqateqartarnissani qilanaaralugu. Ilanngaatit matumani pineqartut allanngortinneqarsinnaanerat oqaloqatigiinnerit taakku pissusissamisoortumik ilagissagaat ataatsimiititaliaq isumaqarpoq. Aalajangiiffigisassatut siunnersuutit assingi pillugit ukiuni siusinnerusuni isumaliutissiissutini oqaatigineqartutut ataatsimiititaliamit oqaatigineqassaaq inummut ilanngaat akinut akissarsianullu 2005-imili iluarsineqarani nalinga taamaaginnartinneqarsimammat. Akit akissarsiallu annertuumik ineriartorfusimanerat ataatsimiititaliamit maluginiarneqarpoq, taamaalillunilu pissutsit malillugit ilanngaat nalikilleriarsimalluni.


### **Siunnersuutip aningaasaqarnikkut kingunerisassai**

Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut Aningaasaqarnermut Akileraartarnermullu Ataatsimiititaliaq oqaaseqaatissaqanngilaq.


## **6. Ataatsimiititaliap inassuteqaatai**

Siuliani allassimasut tunngavigalugit siunnersuut **akuerineqassasoq** ataatsimiititaliap **isumaqatigiittup inassutigaa.**

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappasaaniigassanngortippaa.




Paneeraq Olsen  
Siulittaasoq



Erik Jensen  
Siulittaasup tullia




Hans Aronsen



Agathe Fontain



Aqqalu Jerimiassen



Vivian Motzfeldt



Jens-Frederik Nielsen